

Keco di Dewan: Karpal diusir

Berdegil tapi mengalah bila polis dipanggil

Oleh ZAINAL A.

PULAU PINANG, Isnin — Seorang anggota pembangkang, Encik Karpal Singh (DAP-Bukit Gelugor) dipaksa keluar dari Dewan Undangan Negeri Pulau Pinang oleh Ketua Polis Negeri, Haji Zaman Khan setelah ia enggan mematuhi perintah Speaker, Datuk Haji Hassan Noh supaya keluar dari Dewan.

Encik Karpal pada mulanya berkeras enggan keluar, tetapi akhirnya dia melangkah juga ke pintu Dewan bila begnya dibawa keluar oleh Haji Zaman dan diletakkan di atas meja di luar Dewan.

Encik Karpal mengambil begnya yang sebelum itu terjatuh di bawah meja lalu meninggalkan Dewan menuju pejabatnya di

Lebuh Geraja.

Kejadian itu berlaku semasa Dewan kecoh bila Encik Karpal Singh yang digantung dari menghadiri Dewan masuk ke Dewan secara tiba-tiba.

Beliau digantung dari menghadiri sidang sejak bulan Mei lalu kerana enggan meminta maaf kepada Dewan berikutan tindakan yang tidak menghormati Dewan dan perintah Speaker.

Beliau sebelum itu pernah digantung keahadirannya November, tahun lalu.

Encik Karpal tiba di Dewan jam 9.40 pagi semasa seorang Ahli Exco, Datuk Haji Terahim Razak sedang menjawab soalan mulut yang dikemukakan oleh Encik Mohamed Noor Ahmad (BN-Tasek Gelugor).

Kesemua ahli Dewan hairan melihat Encik Karpal masuk dan duduk selamba di kerusinya tidak jauh dari Speaker.

Datuk Haji Hassan menasihatkan Encik Karpal supaya keluar segera. Bagaimanapun, Encik Karpal membatih dan menyoal Speaker apakah hak demokrasi dan keadilan yang dijalankan?

Membantah

Datuk Haji Hassan sekali lagi memerintahkan keluar dari Dewan. Penyokong penyokong kerajaan turut mendeak beliau supaya keluar Dewan.

Encik Karpal tetap juga membantah keras sambil berkata: "Saya berhak hadir di Dewan ini. Saya mewakili 25,000 orang pengundi di kawasan saya."

Pertikaman lidah yang sengit antara beliau dengan penyokong penyokong kerajaan berlaku.

Seorang penyokong kerajaan bertolak ke Dewan, tetapi Encik Karpal tetap juga membantah dan mencahar Speaker, Ketua Menteri, Dr. Lim Chong Eu dan juga dua orang Ahli Exco yang lain.

Datuk Haji Hassan kemudiannya mengambil keputusan menangguhkan sidang Dewan.

Bagaimanapun, Encik Karpal masih juga enggan meninggalkan kerusi.

Sejurus kemudian dua orang anggota polis, Kopral Asuddin Musa dan Konstabel Mustaza Mohamed Zaimah masuk ke Dewan menasihatkan Encik Karpal meninggalkan Dewan tersebut.

Encik Karpal mencabar kedua anggota polis itu supaya menunjukkan surat dan bertanya mereka di mana mereka dapat peritah mengarahkan dia keluar dari Dewan.

Bagaimanapun, Encik Karpal keluar juga meninggalkan Dewan bila Ketua Polis Negeri Pulau Pinang, Haji Zaman Khan meminta beliau meninggalkan Dewan diikuti tepukan para penyokong kerajaan.



Bahan asal dari Arkib
Negara Malaysia

Anggota Pembangkang (DAP-Bukit Gelugor), Encik Karpal Singh (berhaju hitam) yang digantung dari menghadiri Dewan Undangan Negeri Pulau Pinang terpaksa beralih dan beredar meninggalkan Dewan setelah dinasihatkan berbuat demikian.

— Gambar-Berita Harian oleh Chen Chen Yu.